

Morning Dogri (NSD) National News Bulletin 06-05-2024

आकाशवाणी

- लोकसभा चुनावों के त्रिए गेड़ तैहत् कल होने आले मतदान लेई सब्बै लोड़चदे प्रबंध करी लैते गे न। इस गेड़ तैहत् 10 राज्यें ते 1 केन्द्र शासत प्रदेश दी कुल 93 लोकसभा सीटें लेई वोट पाए जाने न।
- लोकसभा के अगले गेड़ के चुनावों लेई प्रचार अभियान जोरें-शोरें चलै करदा ऐ। बड्डी सियासी पार्टिं दे वरिष्ठ नेता मुख्य भरै च रैलियां ते रोड शो करै करदे न।
- मौसम विभाग नै केई राज्यें च जबरदस्त गर्मी के असार जताए न।
- भारती महिलाएं दी चार गुणा 400 मीटर रिले टीम नै पैरिस ओलंपिक लेई क्वालीफाई करी लैता ऐ।
- आईपीएल क्रिकेट च जंदी रातीं होए के मकाबले च कोलकाता नाईट राईडर्स नै लखनऊ सुपर जायंटस गी 98 रंजें कन्नै हराई दित्ता। अज्जै दा मकाबला मुंबई इंडियन्स ते सनराईजर्स बश्कार खेड्डेआ जाग।

<><><><><><>

Campaign

लोकसभा चुनावों के त्रिए गेड़ लेई चुनावों प्रचार कल मुक्की गेआ। 10एं राज्यें ते दादर-नगर हवेली ते दमन ते दीव केन्द्र शासत प्रदेशें च फैली दी दिएं 93 लोकसभा हल्के लेई कल मतदान होग। इस गेड़ च गुजरात दी 25एं सीटें, कर्नाटक दी 14, महाराष्ट्र दी 11, उत्तर प्रदेश दी 10 सीटें लेई वोट पाए जांगन। एह्दे अलावा मध्यप्रदेश दी 9 सीटें, बिहार दी 5, असम ते पच्छिम बंगाल गी 4-4 ते गोवा ते दादर ते नगर हवेली ते दमन-दीव दी 2-2 सीटें लेई वोट पाए जांगन। उआं लोकसभा चुनावों के होरने गेड़ें लेई बी चुनावों प्रचार जोरें-शोरें कन्नै जारी ऐं केइएं राजनीतिक पार्टिं दे नेता समूलचे मुख्य च रैलियां ते रोड शो करा'रदे न। प्रधानमंत्री ते बीजेपी के वरिष्ठ नेता नरेन्द्र मोदी होर ओडिशा के भुवनेश्वर च लोकसभा के विधानसभा चुनावों लेई पाटी के मेदवारें देहककै च प्रचार करने लेई जंदी रातीं भुवनेश्वर पुज्जे ते राजभवन च ठैहरे।

अज्ज प्रधानमंत्री होर ओडिशा दे नवरंगपुर दी चीकीली ग्राउंड च ते गंजम जिले दी गोपालपुर पार्लिमानी हल्के च कनीशी च जनसभाएं गी संबोधत करगंन। एह प्रधानमंत्री हुंदी ओडिशा च चुनावं दी घोषणा मगरा एह पैहला दौरा ऐ। लोकसभा ते ओडिशा दे विधानसभा लेई मतदान 13 मई थमां होग जेहड़ा 4 गेड़ें च होग। उआं कांग्रेस पार्टी दे उत्तर प्रदेश दे प्रभारी अविनाश पांडे होरें फूलपुर हल्के च कॉर्डिनेटरें दी बैठक कीती। दूई बक्खी समाजवादी पार्टी दे अध्यक्ष अखिलेश यादव होरें आगरा इक चुनावी रैली गी संबोधत कीता हा।

<><><><><><>

LS-7th Phase

लोकसभा चुनावं दे 7में ते खीरले गेड़ लेई अधिसूचना कल जारी होग। इस गेड़ च 7 राज्यें ते इक केन्द्र शासत प्रदेश दी 57 लोकसभा सीटें पर मतदान होग। उत्तर प्रदेश ते पंजाब दी 13-13 सीटें, पच्छिम बंगाल दी 9 सीटें, बिहार दी 8 सीटें, ओडिशा दी 6 सीटें, हिमाचल प्रदेश दी 4 झारखंड दी 8 ते केन्द्र शासत प्रदेश चंडीगढ़ दी 1 सीट पर इस 7में ते खीरले गेड़ च मतदान होग। इस म्हीने दी 14 तरीक तगर नामजदगियां दाखल कीतियां जाई सकदियां न। इस गेड़ लेई मतदान पैहली जून गी होग।

<><><><><><>

Bihar-Shah

बीजेपी दे वरिष्ठ नेता ते गृहमंत्री अमित शाह होर अज्ज बिहार दे समस्तीपुर च इक जनसभा गी संबोधत करगंन। शाह होर उजियारपुर संसदी हल्के तैहत नरपोधी च बीजेपी दे मेदवार नित्यानंद राय हुंदे समर्थन च अज्ज इक चुनावी रैली करगंन। बरोधी गठबंधन दी तरफा आरजेडी ने साबका राज्यमंत्री आलोक कुमार मेहता होरें गी उजियारपुर सीट थमां चुनावं मैदान च तोआरे दा ऐ। आरजेडी नेता ते साबका उपमुख्यमंत्री तेजस्वी यादव सरन ते सीवान संसदी हल्के च प्रचार करगंन।

<><><><><><>

Nadda

भारती जनता पार्टी दे अध्यक्ष जे.पी.नड्डा होरें ओडिशा च ओं दे विधानसभा चुनाएं लेई बीजेपी दा चुनावी घोषणा पत्र जारी करी दित्ता ऐ। घोषणा पत्र जारी करदे होई नड्डा होरें घोषणा पत्र च कीते गेदे 21एं वायदें पर तफसील पेश कीती। ओडिशा च 13 मई थमां 4 गेडें च विधानसभा ते लोकसभा चुनाएं लेई मतदान होग।

<><><><><><>

CEO Delhi

दिल्ली दे मुख् चुनावी अधिकारी पी.कृष्णामूर्ति होरें आखेआ जे स्वीप अभियान तैहत गतिविधिएं राएं दिल्ली च युवा मतदाता पंजीकरण च टकोहृदा बाद्धा होआ ऐ। इक ब्यानै च कृष्णामूर्ति होरें आखेआ जे जनवरी म्हीने च मतदाता सूचि दे खीरी प्रकाशन च दिल्ली च पैहली बारी वोट पाने आले मतदाताएं दी गिनतरी च खरा मता बाद्धा दिक्खेआ गेआ। उनें आक्खेआ जे ताजा आंकडे मूजब मतदाता सूचि च पैहली बारी वोट पाने आले वोटरें दी गिनतरी 1 लक्ख 47 ज्हार शा बधियै 2 लक्ख 43 ज्हार होइ गेई ऐ।

<><><><><><>

NEET

राश्ट्रीय मतेयान अजेंसी एनटीए आस्सेआ कल नीट दाखला मतेयान सफलतापूर्वक आयोजित कीता गेआ। इस मतेयान लेई 24 लक्खा शा मते योग्य मेदवार हे। एह मतेयान मुख् दी 57 शैहरें च देसै दे बाहरे 14 शैहरें च लैता गेआ। 2024 ब'रे दा एह मतेयान शांतिपूर्ण तरीके कन्नै सम्पन्न होई गेआ।

<><><><><><>

Weat Wave

मौसम विभाग नै अज्जै तगर पूर्वोत्तर भारत, पच्छिम बंगाल ते दक्खन भारत च लगातार गर्मी बारे गलाया ऐ। तमिलनाडू, रायलसीमा, तेलंगाना ते विभर्द च अज्जे ते कल्लै तगर गर्मी दा मौसम बने दा रौहग। जिसलै के अंदरले कर्नाटक च इस म्हीने दी 7 तरीक तगर गर्मी रौहग। तोआई भारती मौसम विभाग नै मुखे दे बक्ख-बक्ख हिस्सें च बरखा दी पेशगोई बी कीती ऐ।

मोसम विभाग मूजब अरूणाचल प्रदेश, असम, मेघालय, नागालैंड, मणिपुर, मिजोरम ते त्रिपुरा च अगले 6एं दिनें दरान हौली थमां दरमेयाने दर्जे दी बरखा बरने, शमानी बिजली चमकने ते अंधी-झक्खड़ चलने दे असार न। एह्दे अलावा इस म्हीने दी 9 तरीक तगर महाराष्ट्र, मध्यप्रदेश, छत्तीसगढ़, बिहार, पच्छिम बंगाल, झारखंड ते ओडिशा च बी इस्सै चाल्ली दे मौसमी हालात बने दे रौंहगन।

<><><><><><>

Shopian

दक्खनी कश्मीर दे शोपियां जिले च सुरक्षाबलें आतंकवादिएं दे दऊं मददगारें गी कल गिरफ्तार करी लैतां हासल होई दी इक पक्की सूह पर कारवाई करदे होई जम्मू कश्मीर पुलस, फौज दी 34 राश्ट्री राईफल्स ते सीआरपीएफ दी 178 बटालियन नै शोपियां जिले दे अलूरा इमाम साहिब ग्रां च इक जांच नाका स्थापत कीता। इस दरान सुरक्षाबलें आतंकवादिएं दे दऊं मददगारें गी हिरासत च लैता। उंदे कोला 1 पस्तोल, 1 मैगजीन, 8 राउंद, चीन च बने दे 2 हत्थगोले ते होर दुआ ऐतराज-जोग समेयान बरामद कीता गेआ ऐ। इस बारे इमाम साहिब पुलस थाने च मामला दर्ज करियै अगड़ी तफतीश शुरू करी दित्ती गई ऐ।

<><><><><><>

Chattisgarh

छत्तीसगढ़ दे दंतेवाड़ा जिले च कल 35 माओवादिएं सुरक्षाबलें अग्गे आत्म समर्पण करी दित्ता। इंदे चा त्रै माओवादिएं दे सिरै पर ईनाम बी घोषत कीता गेदा हां दंतेवाड़ा पुलस आस्सेआ चलाए गेदे लोन वराटू अभियान तैह्त इनें माओवादिएं दंतेवाड़ा रेंज दे डीआईजी हुंदे अग्गे आत्म समर्पण कीता।

<><><><><><>

Iran

केरल च तट रक्षक बल नै कल संजा कोझिकोड आले समुंद्री कंडे थमां तकरीबन 40 समुंद्री मील दूर ईरान दी इक किशती गी हिरासत च लैता। सूत्रें दस्सेआ जे इक किशती च 6 भारतीय मछवारे सुआर हे, जेह्ड़े ईरान दे पानी आले इलाके च मच्छियां फगड़न गेदे हे।

इस किशतीर गी कोच्चि बक्खी आंदा गोआ। इस आपरेशन च एएलएच हैलीकाप्टर आईसीजीएस अनुभव ते फास्ट अटैक वोट शामिल हे।

<><><><><><>

Relay Paris Olympic

भारती महिलाएं दी चार गुणा 400 मीटर रिले टीम नै बहामास दे नासारु च विश्व एथलेटिक्स रिले दे दुए दौर दी हीट च दूई थाहर हासल करिये पैरिस ओलंपिक आस्तै क्वालीफाई करी लैता ऐ। रूपल चौधरी, एम.आर.पूवक्सा, ज्योतिका श्री दांडी ते शुभा वेंकटेशन दी चौकड़ी नै 3 मिंटें ते 29.35 सकिंटें दे समें दे कन्नै जमैका दी टीम दे बाद दूई थाहर हासल कीती। भारती टीम पैहले दौर दी क्वालीफाइंग हीट च 3 मिंटें ते 29.74 सकिंटें दे समें दे कन्नै 5मीं थाहरै पर रेई ही।

<><><><><><>

IPL

आईपीएल क्रिकेट च जंदी रातीं कोलकाता नाईट राईडर्स नै लखनऊ दे एकाना स्टेडियम च खेड्डे गेदे इक मैच च लखनऊ सुपर जायंटस गी 98 रंजें कन्नै हराई दितता। 236 रंजें दे बड्डे लक्ष्य दा पिच्छा करदे होई लखनऊ सुपर जायंटस दी टीम 16 ओवर ते इक गेंद च शडे 137 रंज गै बनाई सकी। पैहले बल्लेबाजी करदे होई कोलकाता नाईट राईडर्स नै 20 ओवरें च 235 रंज बनाए हे ते इस जित्त कन्नै कोलकाता नाईट राईडर्स नै 20 ओवरें च 235 रंज बनाए हे ते इस जित्त कन्नै कोलकाता नाईट राईडर्स अंक तालिका च 16 अंके कन्नै शीर्ष उप्पर ऐ। कल इक होर मैच च चेन्नई सुपर किंग्स नै पंजाब किंग्स गी 23 रंजें कन्नै हराई दित्ता हा। अज्ज मुंबई दे वानखेडे स्टेडियम च मुंबई इंडियन्स दा मकाबला सनराईजर्स हैदराबाद कन्ने होग, मैच संजा साढ़े 7 बजे शुरू होग।

<><><><><><>